

Angajoqqaat meeqqaminnik arsaagaasimasut angusassamik toraagaqarluni suliniarfigineqarnissaannut siunnersuusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Angusassamik toraagaqarluni suliniarnermi siunertarineqassaaq 2014-imi upernaajunerani ataatsimiinnissami, angajoqqaat meeqqaminnik arsaagaasimasut angajoqqaatut isumassuisinnaanikkullu nukittorsarneqarnissaat, taamaasillutik meeqqat angajoqqaaminnut angerlaqqissinnaaqullugit.

(Inatsisartunut ilaasortaq Jens B. Frederiksen, Demokraatit)

Akissuteqaat

(Ilaqutariinnermut Inatsiseqartitsinernullu Naalakkersuisoq)

Siullermeerneqarnera

Jens B. Frederiksenimut qujaniarpunga siunnersuummik ullutsinnut naleqquttumik ajunngitsumillu isumalimmik saqqummiussaqaamat.

Ilaqutariinni atugarliortuni meerartalinni inuttut atukkat ajortut kingornunneqartartut qaangerniarneranni angajoqqaajusut ajunnginnerusumik tapersortariaqaratsigit Jens B. Frederiksen isumaqatigaara.

Angajoqqaanut atugarliortunut angajoqqaat pisinnaasaannut meeqqallu inerinnissaannut pisariaqartitaannullu pingaartitsisunut neqerooruteqarnissarput pisariaqarpoq. Tamatumani ilaqutariinnut sullissiviit qitiusumik inissisimapput, taamaammallu Naalakkersuisut ilaqutariinnut sullissivinnut tapiissutit qaffanneqarnissaat ilaatigut pingaartitaraat, taamaaliornikkut ilaqutariit, meeqqat inuusuttullu ajornartorsiuteqartut amerlanerit ilitsersuunneqarnermik, siunnersorneqarnermik ajornartorsiortoqartillugulu ikiorneqarnissamik tunineqarsinnaassammata.

Inuiaqatigiinni ajoraluartumik angajoqqaarpoq meeqqamik inuunissaannut peroriartornerannullu ajunngitsumik paarinninnissaminnut nukissaqanngitsunik. Tamatumani angajoqqaat tassaakkajuttarput sumiginnagaanermik nalaataqarsimasut.

Taamaammaat makku aqqutigalugit pikkorinnerulertariaqarpugut:

- Meeqqap peroriartorneranut isumassuinerlu pillugu ilisimasaqarnerulertariaqarpugut
- Angajoqqaatut akisussaasuuneq pillugu ilisimasaqarnerulertariaqarpugut
- Ilaqutariinni meerartalinni atugarliortuni angajoqqaat angajoqqaatut pisinnaasaasa pitsaalerulernissaanni tapersersuisariaqarpugut

Naalakkersuisut 2006-imi sumiginnaasernerup pinaveersaartinneqarnissaa anguniarlugu immikkut ittumik suliniummik aallartitsipput. Immikkut ittumik suliniuteqarneq ingerlaavartumik ineriartortinneqarpoq, ilaatigullu inissiisarnerup pisariaarukkiartornissaa ilaatigut anguniagaalluni.

Ukiakkut ataatsimiinnermi Naalakkersuisuttaaq persuttaasarnermut periusissanik iliuusissatullu pilersaarutitik saqqummiussiniarput. Inuiaqatigiinni ajoraluartumik persuttaasarnerit takussaavallaarput, persuttaanerillu akuttunngitsumik angerlarsimaffinni

pisarlutik. Persuttaanerit pissutaqaataasarput ilaatigooriarluni meeqqat angerlarsimafimmiit arsaarinnissutigisariaqarnerannut.

Naalackersuisuni ilisimalluarparput qanoq ilineraniluunniit suliniutit ineriartortittuartariaqarmata. Taamaammat angalasartussanik pilersitsiniarluta aallartissimavugut nuna tamakkerlugu innuttaasunut sullissinissamik neqeroorsinnaasunik. Aallarniutigalugu innuttaasut kinguaassiuutitigut atonerlunneqarsimasut kingunerlutsitsisut qitiutillugit sammineqassapput. Piffissarli ungasinnerusoq eqqarsaatigalugu anguniarneqarpoq katsorsaalluni suliniarnermi sapinngisamik amerlanerpaat sullinneqarnissaat.

Taamaakkaluartoq isumaginninnerup iluani angusanik tigussaasunik pilersitsiniarutta paasititsiniaanerit katsorsaannissanut ilisimasalinnit neqeroorutigineqartunut unammillersinnaangillat. Taamaammat Naalackersuisut ilaatigut imigassap tungaatigut iliuusissatut pilersaarummik nutaamik suliaqalersimapput, tassuuna innuttaasut amerlanerit siunissami katsorsarneqarnissaat qulakkeerneqassammat. Imigissamik katsorsaanerup nukittorsarnissaani qitiutillugu anguniakkanut ilaavoq isumaginninnikkut suliniutaasunut pitsaanagerusumik tunngavissiuvinissaq. Tamatumanimi ilaqutariinni atugarliortuni angajoqqaat arlaat tamarmilluunniit imigassamik ajornartorsiuteqartillugit isumaginninnikkut suliniutit ingerlatissallugit ajornakusoorsinnaasarpoq.

Kisiannili nassuerutigisariaqarparput meeqqap pisariaqartitai eqqarsaatigalugit suli meeqqat angajoqqaani inissiisarfinni aammalu ulloq unnuarlu paaqqinniffinni inissittariaqartassagatsigit, tassami atugassarititat meeqqat peroriartorfigisaat timikkut tarnikkullu annertuumik innarliisinnaasarmata. Inuiaqatigiittut iliuuseqassalluta pisussaaffeqarpugut, taamaammallu pingaaruteqarpoq suliniutaasut allat saniasigut pitsaanagerusumik inissiisalnissarput.

Naalackersuisuni ilimaginnigilluinnarparput meeqqat inissinneqarsimasut tamakkerlutik angajoqqaaminnut uternissaat. Taamaammat pingaaruteqarpoq isumaginninnikkut suliniutaasut arlariinnut sammitinneqassasut, ilaatigullu pitsaasumik inissiinissaq qitiutinneqarluni. Taamatut oqartoqarpat soorunami meeqqat namminneerlutik angerlarsimaffimmini namminnerlu angajoqqaaminni peroriartornissaat sallitinneqartuartariaqarpoq. Taamaammat angajoqqaat inissinneqartunik meerallit angajoqqaatut pisinnaasaminnik pitsanngortitsinissaat periarfissaqartittuartariaqarparput.

Isumaginninnikkut suliniutit ingerlanneqartut ataatsimut isigalugit sumiginnaanerup pitsaaliorneqarnissaanik ilaqutariillu sanngiitsut ikiorserneqarnissaanik siunertaqarmata Naalackersuisunit inassutigineqarpoq angajoqqaanut inissinneqartunik meerartalinnut suliniutissatut pilersaarut pillugu siunnersuut akuersissutigineqassanngitsoq.